

EAJ kritikatu du EAk «independentziari buruz jarrera desberdinak azaltzeagatik»

«Arduragabekeria da batek zuria eta besteak beltza esatea», adierazi du Erraztik

Felix Iriarte / Gasteiz

EAJn era askotako ahotsak entzun dira independentziari buruz, eta hori «larria» dela uste du EAk. Begoña Errazti EAko lehendakariak adierazi du Eusko Alkartasunak ez dela inondik inora halako ezberdintasunik azalduko, «eraikuntza nazionala bultzatzen duen alderdi independentista» delako.

XABIER ARZALLUZek eta Iñaki Anasagastik ikuspuntu ezberdinak azaldu dituzte independentziari buruz. Lehena alde azaldu da, baina bigarrenak ez du hain aldeko jarrera adierazi. EAJko buruek irratian egin dituzte adierazpenok, eta EAk uste du agerian utzi dutela EAJren barruan dauden «kontra-esanak».

«Arduragabekeria galanta da batek beltza eta besteak zuria esatea. EAren barruan ez zen horrelakorik gertatu, gure apostua independentziaren eta eraikuntza nazionalaren alde erabatekoa baita», adierazi zuen Erraztik.

Independentziaren bideari inoiz baino gehiago eutsi behar zaiola nabarmendu zuen EAko lehendakariak. Errazti prentsaren aurrean azaldu zen bere alderdiko batzorde eragileak egindako hausnarketen berri emateko. Azken asteotan «urrats garrantzitsuak» egin direla esan zuen—abenduen 3ko mobilizazioak, EAEko aurrekontuetan izandako akordioa eta kale borroka gaitzesteko ituna aipatu zituen—, eta bide beretik segitu behar dela nabarmendu zuen. «Ezin

gara geldirik egon; guri arazoak konpontzea, eraikitzea egokitu zaigu», esan zuen.

Beste muturrean «Espainiako nazionalistak» jarri zituen. Madrilek arazoak konpontzeko borondaterik ez duela azaldu eta, aldaketarik ezin dela espero adierazi zuen Erraztik. «Faxismoaren garaitik datorren nazionalismo espainiarra dago, Espainia handia eta askean pentsatzen duena oraindik», salatu zuen.

Hauteskundeetarako zerrendak

Botere horri aurre egiteko indarrak biltzeari ezinbesteko iritzi zion. Horretarako edozein foro baliagarria dela esan zuen Erraztik, eta EAk Madril, Brusela edo beste edozein bozkailu aprobetxatuko duela «Euskal Herria defenditzeko».

Kongresurako hauteskundeak datorren martxoan izango dira. EAn hasi dira jada zerrendak prestatzen; izan ere, Erraztik jakinarazi zuenez, urtarrilaren 15ean Batzar Nazionala eratuko dute eta haren lehen erabakia hauteskunde zerrendei oniritzia ematea izango da.



PAULINO ORIBE / EFE

Onintza Lasa, Begoña Errazti eta Rafa Larreina atzoko agerraldian.

Anasagasti: «ETak gehiago ez ekitea du helburua EAJren ustezko gogorkeriak»

Europa Press / Madril

EUSKAL HERRIAREN independentziaren alde Xabier Arzalluzek egin berri dituen adierazpenak direla eta, Iñaki Anasagastik atzo esan zuen EAJren «ustezko gogorkeria» ez dela benetakoa, «ETak gehiago ekin ez dezan eta desager dadin du helburu», azaldu zuen.

Anasagastiren arabera, Arzalluzek adierazpen haietan zehaztu zuen independentzia orain ez dela posible. «Hankak lurrean dituen alderdia gara. EHren planteamendua Maastrichtetik alden-dua dago, eta zentzugabea da», azaldu zuen.

Txabarrik zuzenduko du EAJren programa elektorala

■ Hilaren 27an onartuko du dokumentua EBBk

Erredakzioa / Bilbo

JOXE JOAN GONZALEZ TXABARRI izango da EAJren hauteskunde programako zuzendaria, Euzkadi Buru Batzarrak hala erabaki ostean. Txabarri Gipuzkoako zerrendaburua izango da datozen hauteskunde orokorretan eta gaur egun Kongresuko Mahaiko idazkaria da.

Diputatu jeltzaleak koordinatutako taldean hauek izango dira: Idoia Zenarruzabeitia

lehendakari ordeak; Joseba Egibar EBBko bozeramailea; Joseba Zubia Senatuko bozeramaile jeltzalea; Josu Jon Imaz, Alvaro Amann, Iñaki Gerenabarrena eta Gabriel Inclan Eusko Jaurlaritzako sailburuak; Maria Esther Solabarrieta Bizkaiko Foru Aldundiko ingurugiro diputatua; Carlos Caballero diputatua eta Jose Maria Muñoz lehendakariaren komisionatua. EBBk abenduaren 27an onartuko du dokumentua.